

**ՄԵԼԳՈՆԵԱՆԻ ՍԱՆՈՒՑ ՄԻՈՒԹԵԱՆ ԿԱԶՄԱԿԵՐՊԱԾ  
ՃԱՇԿԵՐՈՅԹՆՅԱԲԱՔԸ ԱՐՁԱՆԱԳՐԵՑ  
ՄԵԾ ՅԱԶՈՂՈՒԹԻՒՆ**

ՇԱԲԱՍՊ ՊՈՐՃԱԼԵԱՆ ԿԸ ՅԱՅՏԱՐԱՐԷ. «ԱՇԽԱՏԱՆՔԻ ԱՅՍ  
ԹԱՓՈՎ ՅՈՒՍԱՆՔ ՅԱՌԱԶԻԿԱՅ ՏԱՐԻ ՄԱՅԻՍԻՆ ԿՐՆԱՆՔ ԸՍԵԼ  
ԹԷ 2005-ԻՆ ՄԵԼԳՈՆԵԱՆԸ ՊԻՏԻ ՇԱՐՈՒՆԱԿԷ ԻՐ ԳՈՅԵՐԹԸ»

Կիրակի, 7 Նոյեմբերին, Կիպրոսի Մելգոնեանի Սանուց Միութիւնը կազմակերպած էր ճաշկերոյթ–հաւաք մը՝ ի նպաստ Մելգոնեան Կրթական Հաստատութեան գոյերթին: Կէսօրուան ժամը 1.30-ին, շուրջ 320 հայորդիներ՝ Նիկոսիայէն, Լառնաքայէն ու Լիմասոլէն արդէն ժամանած էին Ալամպրա շրջանին մէջ գտնուող «Խրիսթիանա» ընդարձակ ճաշարանը՝ իրենց զօրակցութիւնը յայտնելու Մելգոնեան Կրթական Հաստատութեան: Օրուան պատուոյ հիւրն էր Մելգոնեան բարերար եղբայրներու շառաւիղներէն, իրենց եղբօր թոռը՝ ժագ Մելգոնեան, որ այս առիթով յատուկ ժամանած էր Կիպրոս: Պէյրութէն ժամանած էր Լիբանանի Մելգոնեանի Սանուց Միութենէն պատուիրակութիւն մը՝ նիւթական ու բարոյական զօրակցութիւն յայտնելու Կիպրոսի Մելգոնեանի Սանուց Միութեան: Այս առիթով, Լիբանանէն ժամանած էր նաեւ «Արարատ» շաբաթաթերթի խմբագիր, նախկին Մելգոնեանցի Ահարոն Շխըրտըմեան:

Ճաշկերոյթ–հաւաքը սկսաւ Մելգոնեան Կրթ. Հաստատութեան քայլերգին յոտնկայս երգեցողութեամբ: Ճաշկերոյթ–հաւաքին բացման խօսքն ու հանդիսավարութիւնը կատարեց Պրն. Մասիս Տէր Բարթող, որ հրաւիրեց Լառնաքայի եւ Լիմասոլի հոգեւոր հովիւ Տէր Մաշտոց քինյ. Ազգարեանը՝ օրհնելու սեղաններն ու ներկաները:

Տէր հօր աղօթքէն ետք, օրուան հանդիսավարը անդրադառնալով հաւաքին նպատակին՝ ընդգծեց նիւթական կարողականութեան կարեւորութիւնը՝ դիմակալելու դատական գործընթացէն ակնկալուող մեծագումար ծախսերը: Ան շեշտեց, թէ հակառակ Մելգոնեանը փակելու որոշումին՝ հայութեան մեծամասնութիւնը պիտի շարունակէ պայքարը անոր գոյատեւման ի խնդիր՝ հաստատելով, որ այդ որոշումը ստեղծած է ընդվզման ընդհանուր ալիք մը տարբեր հայագաղութներու մէջ: Ապա, խօսք տրուելով օրուան պատուոյ հիւրին՝ ժագ Մելգոնեան անգլերէնով իր զայրոյթը յայտնեց դպրոցը փակելու որոշման առնչութեամբ՝ ընդգծելով, որ վարժարանը կը մնայ ազգային ինքնութեան

պահպանման գլխաւոր կռուաններէն մին: Ան իր անվերապահ զօրակցութիւնը յայտնեց դպրոցին գոյատեւման ի խնդիր կատարուող պայքարին՝ դատապարտելով զայն փակելու ազգաքանդ որոշումը: Ան ողջունելով Մելգոնեանի Սանուց Միութիւններու ստանձնած յանձնառութիւնը՝ հաստատեց, թէ վարժարանը պէտք է մնայ բաց հայ սերունդներուն առջեւ, ջանքելով ազգային լեզու եւ գիտակցութիւն, մշակոյթ ու պատմութիւն: Ան հաստատեց որ ոչ ոքի իրաւունքն է փակել բարերարներուն կտակած վարժարանը:

Որմէ ետք, յանուն Լիբանանի Մելգոնեանի Սանուց Միութեան վարչութեան, խօսք առաւ Թալին Պապիկեան, որ իր ողջոյնները փոխանցեց բոլոր Սանուց Միութիւններուն եւ յատկապէս Կիպրոսի Սանուց Միութեան, որ վճռած է շարունակել պայքարը ի խնդիր Մելգոնեան Կրթ. Հաստատութեան: Ան հաստատեց, թէ Լիբանանի մելգոնեանցիները կը մնան զօրավիգ Կիպրոսի իրենց եղբայրներուն եւ քոյրերուն, յարելով, թէ Լիբանանի հայ գաղութը խոր մտահոգութեամբ կը հետեւի Մելգոնեանի շուրջ զարգացումներուն եւ ճակատագրին. ան ընդգծեց, թէ Լիբանանի մելգոնեանցիները լայն աշխատանքով կը շարունակեն իրենց պայքարը՝ նիւթական, բարոյական եւ քարոզչական առումներով՝ խափանելու այդ ազգավնաս որոշումը եւ զօրակցելու վարժարանի գոյերթին:

Անկէ ետք, խօսք առնելով Կիպրոսի Մելգոնեանի Սանուց Միութեան ատենապետ Պրն. Շաւասպ Պոհճալեան՝ ամփոփ ակնարկ նետեց այն աշխատանքներուն՝ որ անցեալ ամիսներուն կատարած է Սանուց Միութիւնը տարբեր ոլորտներէ ներս՝ քարոզչական, նիւթական, քաղաքական, բարոյական ու դատական: Ան ողջունելով Կիպրոսի կառավարութեան ու քաղաքական կուսակցութեանց վճռական կեցուածքը ի նպաստ Մելգոնեանին, հաստատեց, թէ Կիպրոսի պետութիւնը ամուր նեցուկ է Մելգոնեանի դատին, յայտնելով, որ հայեր մինչ դպրոց կը փակեն՝ յոյներ կ'ուզեն հայ դպրոց պահել: Ան շեշտեց, թէ հակառակ բոլոր համոզչական ու սիրալիր ջանքերուն՝ ՀԲԸՄ-ի Կեդրոնին հետ կատարուած՝ մնան որոշում չկայացնելու համար, դժբախտաբար առնուեցաւ ազգավնաս որոշում, որուն համար Սանուց Միութիւնները հարկադրուած կը դիմեն դատարան: Ան ցաւ յայտնեց, որ հայը հայուն դատ կը բանայ, բայց ընդգծեց, թէ այլ ելք չկայ Մելգոնեանը փրկելու համար: Ան յայտնեց թէ ՀԲԸՄ-ի Կեդրոնը դժուարութեան մէջ է, երբ անոր նախագահը ամէնուր կը դիմակալէ Մելգոնեանի հարցը, միշտ անոր ընդառաջ կու գայ իր ձախող որոշումին հետեւանքը: Ան ըսաւ, թէ այսօր

մեծ զօրաշարժ կայ ի նպաստ Մելգոնեանին՝ Հայաստանէն մինչեւ Լիբանան ու ԱՄՆ, Եւրոպայէն մինչեւ Աւստրալիա. ան շեշտեց, թէ ստեղծուած է լայն համագործակցութիւն բոլոր Սանուց Միութեանց միջեւ: Ան հաստատեց, թէ նիւթականի մեծ կարիք կայ, քանի դիմացի կողմը ունի ուժեղ նիւթական ու նեցուկ. ան շեշտեց, թէ Սանուց Միութեան ուժը հայ ժողովուրդն է, եւ անոնք, որոնք հաւաքուած են այս հաւաքին՝ որ ապացոյցն է համազգային պոռթկումի: Մինչ, պրն. Շ. Պոհճալեանի խօսքերը կ'ընդմիջուէին որոտընդոստ ծափահարութիւններով, ան բուռն կերպով դատապարտելով Մելգոնեանը փակելու եւ հայ սերունդները հայեցի դաստիարակութենէ զրկելու ՀԲԸՄ-ի Կեդրոնին որոշումը, հաստատեց, թէ «աշխատանքի այս թափով յուսանք յառաջիկայ տարի Մայիսին կրնանք ըսել թէ 2005-ին Մելգոնեանը պիտի շարունակէ իր գոյերթը» նոյնինքն Մելգոնեանի մէջ. ան հաստատելով, թէ իր խօսքերը լաւատեսութեան կամ խանդավառութեան հետեւանք չէին, այլ՝ պայքարի ու համաժողովրդական բնոյթի ընդվզումի արտայայտութիւն, շեշտեց, թէ Մելգոնեանը կը պատկանի հայ սերունդներուն: Ան այդ որոշումը առնողները նմանցուց Հիթլերի բանակին, որ գրաւելով աջ ու ձախ, աւելի ուշ խրեցաւ իր իսկ ծուղակին մէջ: Ան յոյս յայտնեց, թէ պայքարը կը տանի յաղթանակ, աւելցնելով՝ որ պայքարը կը շարունակուի:

Խանդավառ այս ոգելորիչ մթնոլորտէն, շատեր իրենց քսակը լայն բացած մասնակցեցան նուիրատուութեանց, որմէ գոյացաւ պատկառելի գումար՝ ի նպաստ դատական գործընթացին: Ապա, Մելգոնեանի սաներ կատարեցին գեղարուեստական կոկիկ յայտագիր. որմէ ետք, տեղի ունցաւ վիճակահանութիւն: Ձեռնարկը իր լրումին հասաւ աննախընթաց ու բացառիկ յաջողութեամբ:

Երեկոյեան, ժագ Մելգոնեան, ընկերակցութեամբ Սանուց Միութեան վարչութեան անդամներուն՝ ուղղուեցաւ Մելգոնեան Կրթական Հաստատութիւն՝ իր գնայլանքը յայտնելով հաստատութեան շքեղութեան: Ան անձամբ շփուելով աշակերտութեան հետ՝ խոր տպաւորութիւններով հեռացաւ իր հարազատներուն հիմնած կրթօճախէն՝ խոստանալով պայքարիլ ի նպաստ Մելգոնեան Կրթական Հաստատութեան գոյերթին: